

# सेखावाटी तिमाई पतरिका

आपणी सेखावाटी, आपणी बोली

जुलाई सँ सितम्बर-2019

प्रकाशक

निर्माण सोसायटी, नवलगढ़



## औळखाण

आपणै राजस्तान कै मांय घणी सारी बोलियां बोली जा है। बिमै एक सेखावाटी बोली बी बोली जा है। आ बोली राजस्तान कै चूरु, झुझनू अर सीकर जिलै मांय बोली जा है। ई बोली नै आपणै एरिया मांय “सेखावाटी बोली” को नांव दियो गयो है। जखी आपणै घरका, गांमका अर ठिकाणै का लोगां कै सागै बोला हां, पण दो-च्यार बरस सूं ई बोली नै भूलता जार्या हां। ईक्ले आपणी बोली नै बणाया राखबा क्ले कई तरियां की पोथियां बणाई है। आपणी बोली म म्हे एक “सेखावाटी तिमाई पतरिका” बणाई है। बिमै आपणी बोली म बोली जाबाळी काहूणियां, कहबत, सुबिचार, भजन, धमाल, लोकगीत, पाहूळी घरेलू नुसखा अर सिरकार की योजना अ सगळी चीज्यां लिखी गई है। आनै लिखबा को म्हारो ओ मकसद है कि आपणी मान-मरयादा अर धारा नै बणाया राखबा क्ले अर आपणी बोली एक तांती सूं दूसरी तांती म बणी रह सकै। आपणी बोली को अबताई कोई कनै बी लिखेडो रूप कोनी। राजस्तान मांय सैसूं पेली आपणी बोली को लिखेडो रूप देबा को काम निरमाण सोसायटी कै दुवारा कर्यो जार्यो है, पण थहारै लोगां कै सारै बना ओ काम अधूरो है। ईक्ले थहारै लोगां को हक बणै है कि थ्हे म्हारो सयोग करो।

# सिस्कारी योजना:-

## इन्दरा आवास योजना

इन्दरा आवास योजना को उदेस्य है कि जस्वा गरीबी लेण सूं तळै रहबाळा कुणबा है, बनै घर बणा'र देणो। आ योजना कार कररी है, घर बी बणर्या है, पण दूसरी योजना की जंय्या आ योजना बी भरस्टाचार म रळगी है, जंय्या बी. पी. अल. सूची है। कई बर घर लेबाळा की सूची म अमीर लोगां को नांव बी आज्या है, नै कि गरीबी लेण सूं तळै रहबाळा जस्वा गरीब अर कमजोर है।

### 1.समंटी बिभाग

केन्दर सिस्कार:- गरामीण बिकास मंतरालय

राजस्तान सिस्कार:- राजस्तान गरामीण बिकास बिभाग

2.हक्क (Best source: Indira Awas Yojana <http://iay.nic.in/netiay/home.aspx>)

भारत निरमाण कै मांय लकस्य है कि गरीब कुणबा का लोगां कै घर बणायो जा।

इन्दरा आवास योजना:- इन्दरा आवास योजना कै मांय तळै की सरत पूरी करबाळा बी.पी.अल. कुणबा क्ले घर बणाबा की योजना है

- अनुसूचित जाति/ जनजाति का कुणबा जस्वा जुलम को सिस्कार है।
- अनुसूचित जाति/ जनजाति का कुणबा जस्वा खास करर रांड/बना ब्यायेडी बिरबानी आवास है।
- डील सूं या फेर दिमाक सूं बेमार लोग।
- बेंक या डाग खातो या खाली नगद दुवारा भुगतान जठे बेंक या डागघर कोनी होवै। (सिस्कारी कागज-पानडा देखणा क्ले ऊपर दियेडी बेबसायट नै खोल'र देखल्यो)

### सायता की सींव

- 70,000 रिपिया नुया मकान बणाबा क्ले, ईकै सागै ई 20,000 रिपिया 4 परतिसत कै इसाब सूं ब्याज पै दिया जा है।
- 15,000 रिपिया काचै मकान नै पाको बणाबा क्ले दिया जा है।

3.फारम भरबा को तरीको (सुफल होबा को चानस 30 परतिसत, टेम की सीमा 02 बरस)

जरूत कै इसाब सूं गराम पंचायत, गराम स्तर पै काम करबाळा, बिकास अधिकारी या फेर जिला पंचायत अधिकारी सूं मेळ-मिलाप करबो चाये।

\*भरबा क्ले एक फारम।

\*जमीन कै मालिक को फारम-1 अर 15 / असैमति फारम।

\*गराम सभा को परस्ताव।

\*रासन कारड की कोपी।

4. टबाव (जे फारम भरबा कै पाळै सुफलता कोनी मिलै)

(क) गराम पंचायत सूं सीदा मेळ करो।

(ख) बडी कचेडी कै आयुक्त का सलाहकार सूं मेळ करो (आपां जखा नै जाणा हां)

(ग) गरामीण बिकास मंतरालय म आर.टी.आई. देणी चाये।

## देसी नुसखो

### पेट कै कीड़ा नै मारबा को इलाज

I.जे टाबर कै पेट म कीड़ा पड़यां होवै तो बिनै नारेळ को पाणी या फेर काचो नारेळ खुवाणो चाये जखा सूं पेट का कीड़ा मर ज्यासी। नारेळ की गिरी खाबा कै तीन घंटा पाछै 200 गराम दूद म दो चमची अरंडी को तेल मिला'र पाबा सूं बी टाबर कै पेट का कीड़ा हंगार कै सागै बारै आ ज्यासी।

II.दाडू कै रस नै रोजिना काम म लेबा सूं टाबर कै पेट का कीड़ा चोखी तरियां खतम हो ज्याय है अर भूख बी चोखी लागै है।

III.इरंडकाकड़ी की एक चमच रस नै सुबैरै पेली दूद म मिला'र पीबा सूं बी पेट का कीड़ा मर ज्याय है। आ दुवाई टाबरां क्ले चोखी है, जिसू पेट का सगळा कीड़ा मर ज्यासी।

IV.नीमू नै काट'र आदै म लूण अर काळी मिरच मिला'र तातो करकी टाबर नै चुसावो जखा सूं बी पेट का कीड़ा मर ज्यासी।

V.सैतूत अर खाटै दाडू का छूंतका नै पाणी म उबाळ'र पीबा सूं बी पेट का कीड़ा मर ज्यासी।

VI.अजवाण नै बी पेट कै कीड़ा दूर करबा क्ले काम म ली जा है। देसी इलाज म पेट कै कीड़ा नै मारबा क्ले अजवाण कै सागै गुड़ खाबा की राय दी जा है। दिकत होबा पै खाली पेट सुबैरै थोड़ो सो गुड़ खा'र आदै घंटा ताई अडिको फेर एक गिलास पाणी कै सागै आदी चमच अजवाण खावो। कीड़ा की दिकत पूरी तरियां खतम करबा क्ले आ दुवाई दिन म एक बार दो हफता ताई खाणी पड़सी। अंय्या करबा सूं पेट का कीड़ा मर ज्यासी।

VII.हळदी पेट कै कीड़ा क्ले भोत ई चोखी है। आ एक कीड़ा मारबा की दुवाई की जंय्या काम करै है अर ईमै मजूद कई भांत का गुण पेट कै कीड़ा नै मारबा म मदत करै है। ईकै अलावा हळदी सूजन, कबज, ओकारी अर पेट दरद नै बी दूर करै है। कीड़ा की परेसानी सूं बचबा क्ले काची हळदी कै रस म चुटकी भर लूण मिला'र खाली पेट सुबैरै पीबा सूं कीड़ा मर ज्या है।

VIII.लूंग बी पेट का कीड़ा मारबा म भोत मदत करै है। कीड़ा की परेसानी सूं बचबा क्ले एक कप गरम पाणी म लूंग कै पोडर की एक चमच मिला'र थोड़ी देर अंय्या रहबा द्यो। फेर ईनै पिल्यो। पेट कै कीड़ा सूं बचबा क्ले ईनै एक हफता ताई पीणो चाये।

## सेखावाटी पाहळी

1.अम्बर सूं गाडो गुडादयो - भूरती भैस भूरा पाडा अम्बर परिया गुडगा गाडा।

2.हाथी सूं लादो मंगादयो - झिरमिर-झिरमिर छांट पडै गोडा सूदो कादो तावड़िया की चूचाट म हाथी ल्यावै लादो।

## सेखावाटी भजन

समज मन मायला

कोई तन दुखी तो कोई मन दुखी ओर कोई निरधन भया उदास।

थोड़ा-थोड़ा सबी दुखी तो एक सुखी राम को दास॥

समज मन मायला रै बीरा मेरा मेलोड़ी चादर धोय [टेर]

गुरु सा खुदाया कुवा बावड़ी रै बीरा मेरा नीर ए गंगाजळ होय

कई रै संत तो न्हायगा रै बीरा मेरा कई गया मुख धोय [1] टेर

तन चादर नै धोय ले रै बीरा मेरा मनस्यारी साबण होय

सूरत सीला पै दे फटकारो रै बीरै थ्यानै बिन को तांतो होय [2] टेर

रोईडो रंग फूटरो ए बीरा मेरा फूल अजब रंग होय

उफो तो दिखणी भोम म रै बीरा मेरा ब्याईनै मिलसै नै कोय [3] टेर

रूखो रै चनण सांवळो रै बीरा मेरा मरहम जाणै नै कोय

काट्या तो कंचन होय सी रै बीरा मेरा सहज सुगंदी होय [4] टेर

लिखमै माळी की बिनती रै बीरा मेरा गांम गया गम होय

तिजी तो पेड़ी लांघज्यो रै बीरा मेरा चोथी म तिरणा होय [5] टेर

## सेखावाटी धमाल

धोळागड म राज

एहे...धोळागड म रै राज तुम्हारो देबी ए धोळागड म [टेर]

एहे...कै गज ऊंचो ए देबी भवन देवरो

ए... कै गज ऊंडी ए थहारी नीवडली रै धोळागड म [1] टेर

एहे...नो गज ऊंचो ए थहारो भवन देवरो

दस गज ऊंडी ए थहारी नीवडली रै धोळागड म [2] टेर

एहे...कै लख आवै ए थहारै बाळक बांजड़ी

एहे...कै लख आवै रै जडूले वाळी ए धोळागड म [3] टेर

एहे...नो लख आवै रै थहारै बाळक बांजड़ी

दस लख आवै रै जडूले वाळी रै धोळागड म [4] टेर

आद राखो  
सैऊं बडो  
अपराद  
जुलम सैणो  
अर गळत  
कै सागै  
समजोतो  
करबो है।

**बणावाळा (संपादक)**

कमलेश रोयल अर विक्रम सिंह

**मदत करवाळा**

मुकेश कुमार योगी, रतन लाल योगी

अर कविता योगी

**ठिकाणो (प्रकाशक)**

निर्माण सोसाइटी

आथूना मोहल्ला, खत्री कॉलोनी

वार्ड नम्बर 6, नवलगढ़

झुंझुनू, राजस्थान, पिन कोड - 333042

Email- [rajasthanlanguages@nirmaan.org.in](mailto:rajasthanlanguages@nirmaan.org.in)

Web- [www.nirmaan.org.in](http://www.nirmaan.org.in)

फोन नम्बर - 01594-223776, 9785087657,

9950079259